



**Forum Competens Quæstionibus ex Universo Jure
selectis, atque ad praxin utilissimis illustratum, Seu
Tractatus Canonico-Civilis**

Friderich, Melchior

Ingolstadium, 1709

§. IV. Quis sit Index competens, si delictum in uno loco onchoatum, in altero consummatum sit?

[urn:nbn:de:hbz:466:1-61662](#)

ritorio minus delictum commisum est, & idcirco ad eum facienda est remissio, ac postea reus ad alterum Judicem pro majore delicto puniendus mitti debet, cum à mitiore poena incipiendum sit. Si utrumque delictum & poena æqualia sunt, ille priùs cognoscit & punit, apud quem detinetur reus. Si denique poena sunt incompatibilis, v. g. si utraque est capitalis, pariter procedit ille Judex, à quo reus detinetur. Ita communis apud Haunoldum *tom. 6. de Just. tr. 1. n. 92.* Quin in tali casu infligi debebit poena utriusque delicto correspondens, si is, qui punit, vindicare potest delicta alibi commissa, uti potest Judex domicilij, & de consuetudine etiam alij, in quorum territorio deprehenduntur rei. Ratio est, quia delicta non debent manere impunita; quod fieret, si poena infligeretur uni solum delicto respondens.

156. *Dubit. VII.* An Judex domicilij contra reum possit procedere, si alter, ad quem fuit remissus, sit morosus & negligens in puniendo. *Affirmant* post Bart. & Alex. Decian. *I. c. n. 27.* Farin. *I. c. n. 23.* eò quodd delictanōn debeant manere impunita. Hinc negant, posse à Judice delicti opponi remissionem & litis pendentiam. Ob paritatem rationis idem dicendum videtur de Judice delicti respectu Judicis domicilij. Addit Alex. *in L. de die. §. fin.* ff. qui satis d. cog. n. 8. posse ab eo, qui remittit, Judici remissionem petenti præfigi terminum, intra quem expediatur causa; secūs se processurum contra delinquentem.

S. IV.

*Quis sit Judex competens, si delictum in uno
loco inchoatum, in altero consummatum fuit.*

SUMMARIUM.

157. *Multiplex status questionis proponitur.*

158. *Utriusque territorij Judex est competens, si delictum in uno
inchoatum, in altero consummatum fuit respectu tam agentis,
quam patientis.*

159. *Aut etiam solum agentis aut patientis.*

Q. 3

160.

160. *Imò etiamsi delictum in uno territorio solum mandatum, in altero consummatum fuit.*

161. *Respondetur ad opposita.*

162. *Declaratur, quid tenendum sit de cooperantibus.*

163. *Et quid, si delictum est perpetratum in confinio territoriorum.*

164. *Quid item, si perpetratum est in via publica.*

157. Tres hic casus distinguant Felin. in c. ult. de for. comp. n. 13. & Farin. L. 1. prax. crim. tit. 1. q. 7. n. 44. Primus est de delictis inchoatis in uno loco, & perfectis in alio tam respectu agentis quam patientis, v. g. si quis aliquem aggrediatur vel capiat in uno loco & insequatur vel ligatum trahat in alium, ibique spoliet aut occidat: aut si feminam rapiat hic & alibi violet. Secundus est de delictis inchoatis in uno, & consummatis in alio, non respectu utriusque, sed agentis tantum vel patientis. Ut si quis stans in territorio Bavarico & bombardam explodens trajeciat stantem in Neoburgico: aut existens in illo delictum fieri mandet in isto. Tertius est, quando in delictis in uno loco inchoatis, & in alio consummatis, nec agentis nec patientis persona concurrit. Ut si delicta tractentur & praeparentur in uno loco, perpetrentur in alio: aut si quis delictum suo nomine alibi patrandum hic approbet & ratificet. Verum non apparet, quomodo hic casus à prioribus, aut certè à secundo differat.

158. De primo casu dicendum est, utrumque Judicem esse competentem, ita ut alteruter, qui prævenerit, possit procedere absque altero, neque teneatur remittere reum. Bald. in L. si quis non dicam C. de Episc. & Cler. col. 3. Marsil. in L. un. C. de rapt. virg. n. 150. Felin. l. c. n. 3. Farin. l. c. n. 45. quia utriusque territorium violatum fuit, si tam initium quam consummatio actus fuerunt illicita. Si verò licitum fuisset initium, v. g. si in uno territorio dominus servum aut pater filium moderatè coepisset castigare, & persequendo in aliud ibidem modum excederet & vulneraret, aut occideret, ad Judicem posterioris tantum territorij punitio pertineret, ut notat Felin. l. c. Hinc patet responso

ad

ad celebrem quæstionem, quâ queritur, utrûm fur puniri possit in illo territorio, ad quod cum re furtiva profugit: dicendum enim est cum Bart. in *L. si dominum ff. de furtis*, ac plurimis alijs contra Clar. cit. §. fin. q. 38. *V. tu scis.* Covarr. cit. c. 11. n. 9. Farin. l.c. à n. 7. Fachin. L. 9. c. 19. posse puniri non tantum, ubi furtum fecit; sed etiam ibi, quò cum re furtiva se recepit: quia continuata contrectatio est continuatum furtum, & quò longius rem furtivam aufert, eò gravius laedit, eóque loco puniri potest delinquens, ubi scandalum præbetur ac perniciosum exemplum; hoc autem fit per furti continuationem. Neque obstat, quòd delictum sit moraliter unum, & ideo non multiplicetur actio furti respectu ejusdem domini: quia continuatio retentionis sufficit, ut censeatur utrobique delinquisse & utrumque locum violasse.

159. Alter casus de jaculante in hoc territorio & occidente existentem in alio, controversus magis est. Afferunt Bart. in *L. libellorum ff. de accus.* Felin. l.c. n. 14. Zanger de *except.* p. 2. c. 1. n. 233. Carpz. p. 3. *pract. crim.* q. 110. n. 18. puniri reum posse tantum ibi, ubi consummatum delictum fuit. Utrobique vindictam in solidum sumi & poenâ ordinariâ delictum consummatum puniri posse tradit communis aliorum apud Farin. l.c. n. 46. & Palao *tr. disp.* I. *pun.* 24. §. 5. n. 28. ubi ait, ita receptum esse consuetudine jure gentium introductâ. Quæ sententia apertè tradi videtur *L. 1. C. ubi de crim. agi oport.* ubi dicitur, perfici debere quæstiones criminum, *ubi commissa vel inchoata sunt.* Neque satisfaciunt, qui dicunt, textum intelligi debere de quæstione inchoata, videlicet perfici eam debere, ubi inchoata fuit, id est à Judice vel delicti consummati vel domicili: nam verbum *inchoata* cùm sit generis neutrius, non potest aptè referri ad substantivum *quæstiones*; estque sub hoc verbo *inchoata* intelligendum id, quod sub verbo *commissa*; atqui sub hoc intelligi nequeunt *quæstiones*, cùm crima, non quæstiones committantur. Et ita hanc legem intelligunt Wesenbec. & Brunnem. *ibi*, Hillig. in *Don. L. 17. c. 16. lit. B.* Rittershus.

hus. in *Novell.* p. 9. c. 10. n. 56. Rationem communiter dant, quia, ne delicta maneant impunita, expediebat, ut utrique territorio jurisdictio tribueretur; præsertim quia utrumque in tali casu laeditur, & aliquando delictum facilius probari potest in uno, quandoque facilius in altero. Neque obstat, quod asserit Carpz. l. c. n. 19. & 20. in delictis qualitatem potius patientis, quam agentis considerari: hoc ipsum enim hic controversum est, & cit. L. 1. contrarium statuit: neque refragatur text. L. 43. ff. de ritu nupt. quem adducit, ut consideranti patebit. Pariter non obest, quod ait, delictum in loco, ubi perficitur, suam accipere formam, per quam dicitur delictum: nam bene dicitur, etiam ibi accipere suam formam, ubi actio efficax ponitur, ex qua sequitur virus aut mors. Illud omnino concedendum est, quod cum Bart. & communi tradit idem Carpz. L. 2. Jur. Elect. resp. 28. arg. l. D. Adr. ff. ad L. Cornel. de Sicar. L. 15. pr. & L. 52. ff. ad Leg. Aquil. si quis vulneratus lethaliter hic fuit, & postea alibi mortuus, non ibi vindicandum crimen, ubi mors secuta est, sed ubi actio mortifera posita vel virus inflictum: quia in delictis non tam exitus, quam factum, voluntas, & animus delinquentis consideratur. Qua de causa sacrilegium non committit nec asylo privatur, qui extra locum sacrum vulnerat, tametsi vulneratus se recipiat in locum sacrum, ibique moriatur.

160. Major adhuc controversia est de mandante, utrum videlicet hic, ubi mandatum dedit, puniri possit ob delictum ex suo mandato alibi perpetratum. Negat communis DD. apud Farin. l. c. n. 4. Certum in primis est, posse mandatum in loco mandati puniri poenâ extraordinariâ & mitiori, quæ mandantibus imponi in delictis atrocibus solet etiam effectu non secuto. Certum pariter est, puniri poenâ ordinariâ posse in casu, quo solum mandatum & affectus, quamvis effectu non secuto, punitur poenâ ordinariâ, qualis casus de assassinatu mandato habetur C. 1. §. 2. de homicid. in 6. ac aliis L. quisquis 5. C. ad L. Jul. majest. Sed & absolute puniri poenâ ordinariâ mandantem in loco man-

dati

dati posse, si effectus fecutus est, censeo cum Bald. Alex. aliosque, quos allegat & sequitur Farin. l. c. n. 28. §. verum, & §. in hoc, ac Haunold. l. c. à n. 97. quia hic puniri potest lapidem aut glandem mortiferam hic emittens, & occidens existentem in alio territorio, ut modò dixi num. præced. at inter mandantem & jaculanem videatur esse omnimoda paritas, quia uterque est causa efficax mortis secuta, & æquè homicida est, qui est moralis causa homicidij, quam quiphysica, teste ipso Deo Davidem ob Uriæ cædem mandatam argente & puniente, & æquali poenâ plectitur mandans homicidium ac illud committens, ut fusè Menoch. de arbitrar. L. 2. cas. 353. n. 2.

161. Neque obest, quod pro contraria opinione affertur ex L. si quis uxori §. neque verbo & L. qui servo §. 1. ff. de furt. obligationem, quam mandans tenetur, non ex mandato, sed ex delicto oriri: tametsi enim ex delicto teneatur, non tamen sequitur, quod ibi tantum puniri possit, ubi delictum physicè patratum est; sicut non sequitur, quod ibi puniri debeat, ubi effectus seu mors secuta est, tametsi propter hunc effectum puniatur. Pariter non obest, quod ajunt, mandantem & mandatarium teneri ex delicto, quod est idem ac unicum respectu utriusque, ac propterea utrumque in loco delicti puniri debere ob continentiam causarum. L. nulli C. de judic. nam etsi idem sit factum & delictum, diversæ tamen ex illo oriuntur obligations, quarum una non accedit alteri, ut post Boss. declarat Farin. l. c. §. tertio facit, ac propterea cessat ratio de continentia causarum. Verum de hoc uberioris infra, quando de hac continentia agetur.

162. Circa tertium casum n. 157. in fine propositum varias distinctiones adhibet Farin. n. 49. Mihi breviter dicendum videatur quoad primum exemplum de præparante delictum in uno loco & exequente in alio, si ipse, qui hic illud præparavit, exequatur in alio, puniendum esse in loco delicti, nisi locus, ubi instructum fuit delictum, sit locus domicilij. Farin. l. c. §. quod si cum Bart. Angel. & Beroio. Si ille, qui hic tractavit de delicto, non sit is, qui alibi est executus, idem dicendum est, quod de

R

man-

mandante. Et quidem puniri hic poterit poenâ ordinariâ, si auxilium & opem, imò & consilium præstítit actu, & per hæc causa efficax fuit committendi delicti, aliàs non patrandi, ut tradit communis apud Menoch. *L. 2. de arbitrar. cas. 349. n. 2. & cas. 351. n. 17.* secùs, si aliunde parato occidere arma præbuit, modum occidendi ostendit, vel consilium dedit: quia tunc minori & extraordinariâ poenâ afficiendus esset. Menoch. *cit. cas. 349. n. 5. & cas. 351. n. 22.* Idem dicendum de ratificante delictum suo nomine patrandum: poterit enim sicut mandans, in loco ratificationis puniri, & quidem poenâ ordinariâ, si sine ratihabitione patrandum non fuisset delictum; quia tunc est instar mandantis, ut observat Menoch. *cit. cas. 351. n. 27.*

163. Sed dubium restat, quid tenendum sit, quando delictum patratum fuit in confinio duorum territoriorum, auf^z der Gränz und Anwandlung / & ignoratur, in utro eorum patratum sit. In varias h̄ic opiniones abierunt DD. Nam primò non pauci, ut Innoc. *in C. super eo n. 2. de Paroch. Schneidevvin. ad §. ult. n. 8. Inst. de Jur. N. G.* & C. Petr. Theodor. colleg. *crim. disp. 4. th. 3. lit. B. Zanger. de except. p. 2. c. 1. n. 137.* ac alij ajunt, considerandum esse locum, in quo caput tanquam principalior pars reperitur, & loci hujus Judicem censeri debere competentem excluso alterius territorij Judice. *arg. L. 44. ff. de relig. & sumpt. fun. ac L. 17. C. de pœn.* Hancque opinionem communiores & praxi receptam asserit Zang. cum Theod. ubi tamen addunt cum Bald. *in L. 2. n. 1. C. ubi de crim.* & Nic. Everhard. *in top. loc. ab extremis n. 1.* utrumque esse competentem, si occisus ita prostratus jaceat, ut caput ejus utrumque territorium contingat. E contrario Niellus apud Carpz. *cit. q. 110. n. 31.* aliisque apud Bocer. *tr. de Jurisd. c. 9. n. 12.* eum tantum Judicem hoc casu competentem pronunciant, in cuius territorio pedes occisi reperiuntur, cùm verisimile sit, ibi occisum fuisse, ubi stetit, qui interfectus fuit. Tertiò alij apud Carpz. *l. c. n. 28.* Judicem præferunt illius territorij, in quo cadaveris pectus & cor reperiuntur.

Qarto

Quartò Bald. in *L. arbor.* 19. ff. *comm. divid.* Zaf. *ibid.* v. *nota maleficium*, Casp. Leipoldi *de concurr. jurisd.* q. 13. Treutl. & Bachov. *vol. 1. disp. 19. th. 4.* aliisque non pauci, utrique Judici jurisdictionem concedunt, ita ut ille præferendus sit, qui alterum prævenerit tollendo particulam vel corporis vel vestis sanguinolentam ein freß Pfand / oder Stich- und Wundenmaß. Mihi postrema hæc opinio præplacet: cùm enim dubium omnino sit, quo in territorio vulnus lethale inflictum sit, eò quòd signa illa pedum vel capitis in alterutro territorio jacentium incerta sint, ut benè ostendunt Carpz. Bocer. & Bachov. ll. cc. rectè mediā viâ inceditur, & utrique Judici jurisdictione conceditur, quia ratio vel conjectura, ut ponitur, non magis stat pro uno, quam pro altero. Et ita in simili casu de Parochijs & Decimis in confinio sitis & dubijs discurrunt DD. cum Panor. in *C. fin. de Sent. n. 5.* & in *C. sanè §. additio de For. com. n. 7.* ac Felin. in *C. omnes de major. & obed.* Si tamen constaret, quo in territorio steterit occisor, quando vulnus lethale inflixit, illud præferendum censeo: quia Judici illius competit jurisdictione juxta dicta *n. 159.* & dubium est, an competat etiam alteri: jurisdictionem autem certam aut multū probabilem unius excludere nequit dubia alterius. Nisi forte ante preventionem factam reus verisimiliter assereret, vulnus inflictum fuisse in altero territorio: tunc enim utrique competenter jurisdictione juxta dicta *cit. n. 159.* Idem dicendum existimo in casu, quo sanguis effusus appareat in uno territorio: tunc enim hujus Judici privativè competere jurisdictionem non dubito, saltem si unum tantum vulnus inflictum fuerit: signum enim est, quòd occisus hic receperit vulnus lethale, & ulterius ad confinia progressus ibique mortuus fuerit, tametsi sanguis ibi etiam reperitur, ubi cadaver. Idem dicendum cum Treutl. l. c. ac alijs, & utrique Judici cum jure præventionis competere jurisdictionem existimo, quando cadaver reperitur in flumine publico utrumque territorium terminante.

164. Similis & priori connexa quæstio est, ad quem pertinet

R 2

neat

neat cognitio criminis in via publica patrati. Hic rursus colliduntur opinione. Cognitionem & coercitionem competere ei, cuius est jus regale in via publica, existimant Zanger. *de Except. p. 2. c. 1. n. 241.* Borcholt. *ad c. un. L. 2. feud. n. 24.* Schneidervin. *in §. ult. Inst. de Jure G. N. & C. n. 8.* Beuster. *in L. admonendi, 31. ff. de Jurojur. v. 1.* Thom. Michaël de Jurisd. *concl. 50.* Sixtin. *L. 2. de regal. c. 2.* Carpz. *l. c. n. 41.* eò quòd juxta non paucos via publica inter regalia connumeretur, & Imperatorum ac Principum sit curare ea, quæ ad ejusdem securitatem spectant. E contrario cognitionem illi, qui habet merum imperium in territorio, ubi via publica est, tribuunt cum Alciato & Aurel. Guido Papæ *decis. 573.* Rol. à Valle *vol. 2. conf. 42. n. 35.* Cæpoll. *de Servit. c. 3. n. 30.* Rosenthal. *de Feud. c. 5. concl. 21.* Bocer. *de Regal. c. 2. n. 145. & de Jurisd. c. 9. n. 14.* Hæc posterior præplacet, quia juri est conformior. Nam 1. Via publica, ut cujusque provinciæ, sic cujusque territorij pars est. Cum ergò, qui merum imperium in provincia aut territorio habet, jurisdictionem criminalem ibi exerceat, consequens est, quòd hæc etiam ad viam publicam, & quæ in ea committuntur, se extendat. 2. Via publica dicitur pars fundi vicini *L. Attius. 38. ff. de acquir. rer. dom.* unde cùm via impetu fluminis aut terræ motu amissa est, confinis de suo proximo fundo eam præstare tenetur. *L. si locus 14. §. ult. ff. quemad. serv. am.* Cum ergò magistratus suam jurisdictionem extendat in omnem sui territorij fundum *L. ult. ff. de Jurisd. & L. pupillus §. territorium ff. de V. S.* pariter eam extendit in viam publicam. 3. Prætoris jurisdictione civilis ad viam publicam extenditur *L. 2. §. 20. 35. & ult: ff. ne quid in loco publico, & L. 1. ff. de via publ.* Unde non est ratio, cur non etiam criminalis jurisdictione eorum, qui merum in territorio imperium habent, ad eam extendatur. 4. Qui jurisdictionem habet in terra mari proxima, potest eam porrigitur etiam ad ea, quæ committuntur in mari adsito, ut docent Hier. de Monte *tr. de fin. reg. c. 7. ac alij.*

§. V.